



30. august 2016

EM 2016/98

Naqqiut

Siunnersuut 18. juli 2016-imeersoq taarserpaa.
(Tunngavilersuutaa naqqiuteqarpoq)

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Siunissaq qiviarlugu qanoq iluuseqarluta isumaginnermut ingerlatsinitsinni atorfinitsitsinikkut, ilinniartitsinikkut, pikkorissaaqqinnikkut sulisunillu ilinniarsimasunik annaasaqannginnissarput qulakkeerumallugit 2017-imi ukiakkut ataatsimiinnissami saqqummiunneqartussamik periusissanut iliuusissanullu pilersaarusiornissaannik Naalakkersuisut peqquneqarnissaannik Inatsisartut aalajangiiffigisassaannik siunnersuut.

(Inatsisartuni ilaasortaq Peter Olsen, Inuit Ataqatigiit)

Tunngavilersuut:

Piffissami kingullermi isumaginninnikkut sukkuq tamatigut sullinneqarnissaminnik ikiorneqarnissaminnillu pisariaqartitsisut aatsaat taamak amerlatigilersimapput, tamatumalu kingunerisaanik isumaginninnikkut sullissisugut aatsaat taamak pisariaqartitsitsigalugillu aatsaat taamak atorfissaqartitsigilersimavagut.

Aasaq manna meeqqat illersuisuata, nunarput tamakkingajavillugu angalareernermi kingorna, nalunaarusiani saqqummersimmagu, tamatumalu kingunerisaanik meeqqat sumiginnakkat pillugit oqallinnerujussuarmi, tamanna ilaatigut ersersinneqarpoq uppersarsarneqarlunilu.

Taamaattumik piffissanngorsorinarsilerpoq, isumaginninnikkut sullissisutta akornanni, sulinerikkut qanoq atugassaqartinneqarnerannut tunngasunik eqqartuinerulernissarput, ukkataqarnerulernissarput, pingaartitsinerulernissarpullu.

Isumaginninnikkut sullissisutta akornanni, ulluinnarmi sulinerminni naapittagaat assigiinngitsorparujussuupput, ullormiit ullormut nikerartorujussuusinnaallutik.

Ilaatigut makkuusinnaallutik:

1. Pisortatigut ikiorsiisarnermut tunngasut
2. Suliffissaaleqisunik aammalu piginnaanngorsaqqittunik siunnersuineq sullissinerlu.
3. Meeqqanik sumiginnakkanik sullissineq, ulloq unnuarlu piareersimasussaataaneq.
4. Angajoqqaanik ilaqutariinnillu isumaginninnikkut sullinneqartariaqartunik sullissineq ikorfartuineq siunnersuinerlu.
5. Inunnik inuttut unittoorsimasunik, inuttut ajornartorsiuteqalersimasunik siunnersuineq ikorfartuinerlu.
6. Ullormiit ullormut, tassangaannartunik tupannartunik pisoqarsimatillugu soorlu ajunaarnersuaqartillugu, toqusoqarsimatillugu, imminut toquttoqarsimatilluguluunniit ilaqutariinnik ikorfartuineq siunnersortaaneerlu.

Naluneqanngitsutut ilinniarsimangitsut akornanni suliffissaaleqinerujussuaqarpoq. Ilaatigullu tamatuma kingunerissaanik imigassamik ikiaroonartumilluunniit atornerluinerujussuaq annertusigaluttuinnarsimavoq, tamatumalu aamma kingunerisaannik ajuusaarnaraluartumik

meeqqanik sumiginnaanerujussuaq annertusigaluttuinnarsimavoq, tamatamalu aamma kingunerisimavaa isumaginninnerup iluani sullissisugut ajoraluartumik suliassaminnut angummassinnaajunnaarsimasut, suliassaqaqpallaalersimasut, ulapippallaalersimasullu tusarsaaleraluttuinnarmata amerligaluttuinnarpalullutillu.

Suliffigisami taamatut atugassaqartinneqarneq sulisunut ataasiakkaanut peqqinnangilaq akuerineqarsinnaangilarlu.

Suliffigisamimi taamatut atugassaqartitaanerup kingunerisinnaasarpai napparsimakulalerneq, suliartunngitsuukulalerneq, uippakajaalernerlu.

Unnialu sulisorpassuatta akornanni taamatut eqqorneqarsimasut amerligaluttuinnarpalupput, taamatullu eqqorneqarnerup kingunipiluusa ilaat tassaalersimavoq, isumaginninnikkut sullissisutta akornanni amerlasuut suliffitsik nuannarijunnaarlugu soraaginnartalersimapput, allamilu sulinissartik kajumerinerulersimallugu.

Tamanna tamatsinnut pitsaasuunngilaq iluaqutaangilarlu.

Taamaattumik isumaqarpunga isumaginninnerup iluani, inulerisoqarnerup iluani, siunnersortitut sulinissaq kajuminnarnerulissappat, atugassarititaasullu pitsanngorsarneqassappata, taava alloriarnerit siulliit ilaat tassaasoq atugassarititaasut tungaatigut qulaajaanissaq.

Periusissiorinnikkut iliuusissamillu pilersaarusiornikkut, isumaginninnikkut sullissutta akornanni atugaat qulaajarneqarsinnaalissapput, tamatumalu kingorunissavaa pitsanngorsaattaasinnaasunik tikkuussaqaarsinnaalerneq.

Periusissiornermi pilersaarusiornermilu ilaatigut makku qulaajarneqarsinnaassapput;

“Qanoq iliornitsigut pisariaqartitsineq naapertorlugu atorfinitsitsiortorsinnaavugut? Ilinniartitsinerit, qaffassaanerillu qanoq ittut ingerlassinnaavugut? Isumaginninnerup iluani sulisut ilinniarsimasut attatiinnassagutsigit taava qanoq iliuuseqaarsinnaavugut? Suliarisartagaat qummut amerlanerpaaffilerneqarsinnaappat? Aningaasarsiaasa tungaatigut qanoq pitsanngorsaasinnaavugut? Qaffaasinnaavugut?” il.il.

Periusissiorinnitsigut iliuusissamillu pilersaarusiornitsigut, isumaginninnikkut sullissisutta akornanni atugassarititaasut pitsanngorsassavagut, pitsanngorsaavigiinnarnatigit aammattaaq ilaqutariinnut meerartalinnut, meeqqanut, utoqqarnut allanullu sullinneqarnissaminnik pisariaqartitsisunut sullissinerput pitsaanerujussuannussaaq; Pitsaanerumik inerititaqarfiunerusumillu sullissisinnaalissaavut. Suliaq sunaluunniit pitsaanerujussuarmik naammassineqarsinnaalissaaq. Tassa siunertaq anguniagassarpullu.

Taamaattumik taamatut tunngavilersuuteqarlunga, oqaluuserisassatut siunnersuutiga taamatut isikkoqartillugu matumuuna inatsisartunut suliassanngortippara.

Neriuppunga torersumik inerititaqarfiulluartumillu aalajangersaasoqarumaartoq.

Qujanaq.

Pisortanut aningaasatigut allaffissornikkullu kingunerisassat

Periusissanik iliuusissanillu pilersaarusiorneq saqqummiussinerlu Namminersorlutik Oqartussanut allaffissornikkut nukinik atuisussaassaaq. Naatsorsuutigineqarpoq suliassiissutigineqartup isimagineqarnerani AC-fuldmægtig-imut ukiup affaa sularitinneqarsinnaassasoq, aningaasanngorlugulu 250.000 kr. missaaniissasoq. Naalakkersuisut tungaanit taama pilersaarusiorneq aallartereernejarsimassappat siunnersuutigineqartup sularineqarnera annikinnerusumik nukinik atuiffiusussaassaaq.

Namminersorluni inuussutissarsiuteqarnermut aningaasatigut allaffissornikkullu kingunerisassat
Soqanngilaq.

Innuttaasunut aningaasatigut allaffissornikkullu kingunerisassat
Soqanngilaq.